

Kerajaan tidak berpeluk tubuh - PM

Oleh Noor Hidayah Tanzizi - Julai 3, 2022 @ 1:28pm
bhnews@bh.com.my

PASIR SALAK: Datuk Seri Ismail Sabri Yaakob menegaskan rakyat tidak akan diminta mengikat perut dalam menghadapi isu kenaikan harga barang dan peningkatan kos sara hidup ketika ini.

Perdana Menteri, memberi reaksi itu bagi membidas dakwaan pihak pembangkang yang kerajaan seolah-olah berpeluk tubuh dan tidak mengambil tindakan dalam menangani peningkatan kos sara hidup.

Katanya, kerajaan juga menyedari kenaikan beberapa harga barang dan beliau turut membuat tinjauan rambang ke premis perniagaan untuk melihat sendiri harga barangan.

Menurutnya, kerajaan masih mengekalkan subsidi barangan asas termasuk petrol dan diesel bagi memastikan rakyat tidak terbeban.

"Minggu lepas di Masjid Jamek, Kampung Baru sebuah parti politik pembangkang mengadakan demonstrasi. Berbagai tuduhan dibuat terhadap kerajaan seolah-olah berpeluk tubuh dan tidak mengambil tindakan kos sara hidup meningkat.

"Fenomena kenaikan harga barang tidak berlaku di Malaysia semata-mata tetapi global dan kita tidak terkecuali," katanya.

Beliau berkata demikian ketika berucap pada Majlis Perasmian Penutupan Jelajah Aspirasi Keluarga Malaysia Negeri Perak di Litar Dato' Sagor, di sini, hari ini.

Yang turut hadir, Menteri Besar Perak, Datuk Seri Saarani Mohamad dan Ahli Parlimen Pasir Salak, Datuk Seri Tajuddin Abdul Rahman.



Perdana Menteri, Datuk Seri Ismail Sabri Yaakob hadir majlis perasmian penutup Jelajah Aspirasi Keluarga Malaysia di Litar Dato' Sagor, Kampung Gajah Pasir Salak. - Foto NSTP/L.Manimaran

Beliau berkata, Malaysia mengimport produk bahan makanan seperti makanan ayam dengan 70 peratus kos pengeluaran disumbang oleh bahan mentah itu yang boleh menyebabkan kenaikan harga ayam.

Bagaimanapun katanya, dalam menangani kos sara hidup kerajaan memperuntukkan subsidi lebih RM70 bilion untuk barangan asas dan tiada subsidi yang ditamatkan.

Katanya, pelbagai usaha juga sedang dilakukan untuk jangka pendek, sederhana dan panjang bagi mengatasi masalah itu termasuk menubuhkan beberapa jawatankuasa.

"Kita (beri) subsidi makanan dan harga ayam sebanyak RM700 juta untuk memastikan harga kekal RM8.90. Minyak masak RM4 billion supaya harga minyak pek RM2.50 kalau tak RM9.50 sekampit (untuk) sekilogram.

"Subsidi tidak ditamatkan pada 1 Julai cuma untuk 'one off' minyak botol yang diperkenalkan pada Perintah Kawalan Pergerakan (PKP) tetapi sekarang dah tamat (PKP) jadi tak perlu lagi tapi mereka mengatakan kita tak buat apa-apa," katanya.



Perdana Menteri, Datuk Seri Ismail Sabri Yaakob berucap pada perasmian penutup Jelajah Aspirasi Keluarga Malaysia (AKM) di Litar Dato' Sagor hari ini. - Foto BERNAMA